

Henny Eman di estadista pa un bida simpel den cunucu

HUMILDE y trankilo den cunucu a caracteriza e bida di un homber cu a marca historia riba e plataformanan estatal di mas halto den Reino. Esey t'e bida sensato y simpel cu Henny a scoge pa despues di a sirbi Aruba den e posicionnan mas clave.

Como e Prome Minister di Aruba mr. Henny Eman tabata ta un figura markante den e historia moderno di nos isla. E visionario di un Aruba Nobo, a eligi di pasa su ultimo añanan den trankilo humildad, brasando un bida cerca di naturalesa y memey di e barío Jaburibari despues di a lidera tres gabinete y despues di a guia Aruba a traves di un di su crisisnan economico mas desafiante.

E legado di Henny Eman ta marca p'e recuperacion economico historico cu el a encabesa despues di e ciere devastado di e refineria na 1985. Bou di su liderazgo Aruba, no solamente a supera su dificultad economico mas grandi, si no cu el a sigura su posicion autonomo den e Reino Hulandes, un logro historico pa Aruba cu por a mantene su Status Aparte den Reino a base di Henny su perseverancia y maneho strategico na Den Haag, Hulanda.

Sin embargo, a pesar di e logronan inmenso aki, Henny Eman a scoge un bida di simplicidad y humildad den su retiro. E no a ambiciona of busca ningun posicion di consehero, comisariado of cualkier di e otro posicionnan atractivo y lucrativo aki cu ta wordo poni na disposicion di un personahe cu e carera impresionante di Henny Eman. Ora el a muda pa Cunucu na Jaburibari, hunto cu amigonan Henny a construi un cas di palo modesto p'e y su señora Iris Eman-Arends. E mes contribuyendo gran parti di e trabou di carpinteria. E cas di palo simpel aki, rondona pa e beyeza natural di e campo Rubiano, a converti su mes den su santuario. Semper rondona pa su famia, amistadnan y su dos mascotanan stima.

Brasando e tera cu e mesun dedicacion cu el a aplica na su servicio publico, Henny a cuminsa cultiva un pida tereno chikito banda di su cas na Jaburibari. Cu ayudo di amigonan y familiarnan, a sembra pinda y bonchi, instalando un sistema di irigacion y e mes cuidando e



cultivonan.

Su cosechanan, conoci como “Pinda di Jaburibari” tabata wordo bendi den tiendanan chikito den barío di Noord, paketa den saco chikito di plastic of di papel bruin cu tabata refleha e simplicidad di su trabou.

Durante su retiro, Henny a keda asina den otro forma hopi conecta cu su raiznan y su comunidad. Su Land Cruiser bieu, e mesun auto cu e tabata uza tempo e tabata Minister President, a sigui como su medio di transporte confiabel pa mas cu tres decada. E tabata mantene cu hopi cariño, reparando e mes hopi biaha, reflehando su bida humilde y senciu.

E fin di simannan na Jaburibari tabata hopi special. Henny tabata invita otro agricultornan y amigonan pa uni den momentonan ameno ora di sembra y cosecha. E encuentranan aki tabata un di trabao duro, pero tambe di harimento, storianan y esfuerso comparti, personificando e spiritu di bida comunitario cu a defini su ultimo añanan. Semper na un momento asina fiel na su Heineken.

E bida humilde di Henny despues di un carera asina distingui ta un ehemplo profundo di liderazgo basa den servicio, gratitud y simplicidad.

Su historia ta sigui siendo un recordatorio poderoso cu e grandeza berdadero no solamente ta wordo midi pa e logronan publico si no tambe pa e dignidad trankilo y ehemplar cu cua ta biba den amistad di sernan humano y nos naturalesa e ultimo capitulonan di nos bida.

